

Evening Dogri (NSD)

20-03-2026

खबरां

1. राष्ट्रपति द्रौपदी मुर्मु होरें उत्तर प्रदेश दे वृंदावन च रामकृष्ण मिशन सेवाश्रम अस्पताल च नंद किशोर सोमानी ऑन्कोलॉजी ब्लॉक दा लोकार्पण कीता आक्खेआ – सरकार देशै च सेहत सेवा सरबंधी ढांचे गी मजबूत करने आस्तै लगातार जतन करा र दी ऐ।
2. भारत नै आक्खेआ – पाकिस्तान कन्नै सिंधु जल संधि उसलै तगर स्थगित रहोग जिसलै तगर ओहू आतंकवाद गी समर्थन देना बंद नेई करदा।
3. इस्राएल नै प्रधानमंत्री बेन्यादमिन नेतन्याहू हुंदे आसेआ ईरान दे प्रमुख गैस क्षेत्र पर हमला नेई करने दी घोषणा दे इक दिन मगरा ईरान पर हमले परतिऐ शुरू कीते।
4. मौसम विभाग नै कल तगर पश्चिम बंगाल च हिमालय दे तराई क्षेत्रें ते सिक्किम च तेज बरखा दी संभावना जाहिर कीती।
5. फ्रांस च ऑरलियन्स मास्टर्स बैडमिंटन च अज्ज सजा महिला सिंगल्सर क्वार्टर फाइनल च तन्वी शर्मा दा मुकाबला जापान दी नात्सुकी निदैरा कन्नै ते मालविका बंसोड़ दा सामना ईशा रानी बरुआ कन्नै होग।

<><><><><><>

Prez. Strong India

राष्ट्रपति द्रौपदी मुर्मु होरें आक्खेआ ऐ जे मजबूत ते आत्मनिर्भर भारत दा सुखना तां गै साकार होई सकदा ऐ जिसलै उसदे नागरिक सेहतमंद होन। उत्तर प्रदेश दे वृंदावन च रामकृष्ण मिशन सेवाश्रम अस्पताल दे नंद किशोर सोमानी ऑन्कोलॉजी ब्लॉक दा लोकार्पण करदे होई राष्ट्रपति होरें आक्खेआ जे सरकार अज्ज सेहत सेवा दे बुनियादी ढांचे गी मजबूत करने चे हर इक नागरिक आस्तै गुणवत्तापूर्ण सेहत सेवा यकीनी करने आस्तै लगातार जतन करा'रदी ऐ। राष्ट्रपति होरें आक्खेआ जे सेहत सेवाएं दी पुज्ज बढ़ाने आस्तै, खास तौर पर ग्राएं ते दूर दरेडे क्षेत्रें च रौहने आहले लोकें आस्तै, मुख्य भरै च नमे एम्स, मेडिकल कॉलेज ते सेहत ते कल्याण केंद्र स्थापित कीते जा'रदे न। राष्ट्रपति होरें आक्खेआ जे कैंसर अज्ज इक बड़्डी सेहत चुनौती बनिए उभरा'रदा ऐ। उने आक्खेआ जे समे पर हल ते उन्नत उपचार तगर पुज्ज मरीजें दी जान बचाने च महत्वपूर्ण भूमिका निभाई सकदे न। राष्ट्रपति होरें

आक्खेआ जे रामकृष्ण मिशन सेवाश्रम अस्पताल गरीबें दा ईलाज करा'रदा ऐ। इसदे श्वा पैहले अज्ज बडलै राष्ट्रपति होरें प्रेमानंदजी महाराज आश्रम दा दौरा कीता। उने वृंदावन च नीब करोरी बाबा हुन्दी समाधि पर बी पुष्पांजलि भेंट कीती। उंदा वात्सल्य ग्राम दा दौरा करने दा कार्यक्रम ऐ। एह बुजुर्गे, महिलाएं ते बच्चें दी दिक्खभाल आस्तै कम्म करने आह्ला इक कल्याणकारी संगठन ऐ।



India-IWT

भारत नै दोहराया ऐ जे पाकिस्तान कन्नै सिंधु जल समझौता उसलै तगर स्थगित रहोग जिसलै तगर ओहू आतंकवाद गी अपना समर्थन देना बंद नेई करी दिन्दा। संयुक्त राष्ट्र च भारत दे स्थायी प्रतिनिधि पी. हरीश होरें आक्खेआ जे पाकिस्तान गी समझौता संबंधी चिंता पुट्टने सोयां पैहले मानव जीवन दा सम्मान करना चाईदा। उने पाकिस्तान गी आतंकवाद दा वैश्विक केंद्र दस्सेआ। भारत नै 65 बरे पैहले सिंधु जल समझौता पर दस्तखत कीते हे। पाकिस्तान नै सद्भावना दा दुरुपयोग करदे होई भारत कन्नै 3 युद्ध कीते ते नेकां आतंकी हमले करोआए। भारत दे साह्जे सबर ते उदारता कन्नै पाकिस्तान दा रवैया नेई बदलेआ। आखिरकार एहू घोषणा करने आस्तै भारत गी मजबूर होना पेआ। एहू संधि उसलै तगर निलंबित रहोग जिसलै तगर आतंकवाद दा वैश्विक केन्द्र पाकिस्तान हर चाल्ली दे आतंकवाद गी समर्थन देना बंद नेई करी दिन्दा।



BNM-UN

बलूच नेशनल मूवमेंट नै संयुक्तल राष्ट्रस मानवाधिकार परिषद सोयां बलूचिस्तान च कथित तौर पर मानव अधिकारें दे गलत इस्तेमाल पर फौरी कार्रवाई करने दा आग्रह कीता ऐ। स्विट्जरलैंड दे जिनेवा च संयुक्त राष्ट्र मानवाधिकार परिषद दे सत्र च बलूच नेशनल मूवमेंट दी प्रतिनिधि माहरा बलोच होरें लोकें दे जबरन लापता होने, हत्याएं ते अभिव्यक्ति दी आजादी पर पाबंदियें दा मुद्दा पुट्टेआ। सुश्री माहरा बलोच होरें दस्सेआ जे छडा बरे 2025 च गै इक हजार 3 सौ 55 लोक जबरन लापता कीते गए ते 225 लोकें दी हत्याद करी दिती गई।



PM India Energy

प्रधानमंत्री नरेंद्र मोदी होंरें आक्खेआ जे भारत दा ऊर्जा परिवर्तन व्यावहारिक नीतिगत रूपरेखा ते आत्मनिर्भरता दी दिशा च साफ जतन सोयां प्रेरित ऐ। अक्षय ऊर्जा राज्य मंत्री श्रीपद नाइक हुन्दा इक लेख सोशल मीडिया पर साझा करदे होई प्रधानमंत्री होंरें आक्खेआ जे एहू लेख देशै दे ऊर्जा क्षेत्र दी परिवर्तनकारी यात्रा गी रेखांकित करदा ऐ। उने अग्गे आक्खेआ जे भारत विद्युतीकरण, स्वच्छ ऊर्जा ते विनिर्माण पर खास ध्यान देने दे क्रनो क्रनी वैश्विक ऊर्जा परिदृश्य च इक नतीजाकुन अध्याय लिखा र दा ऐ।।

<><><><><><>

ISRO MOU

एकीकृत रक्षा स्टाफ मुख्यालय ते भारती अंतरिक्ष अनुसंधान संगठन दे अंतरिक्ष अनुप्रयोग केंद्र नै सशस्त्र बलें लेई मौजूदा उपग्रह आधारित दूर संचार नोड्स दी आपूर्ति आस्तै इक सहमति पर दस्तखत कीते ना। रक्षा मंत्रालय नै सोशल मीडिया पोस्ट च जानकारी दित्ती ऐ जे दवें पखें मौजूदा उपग्रह आधारित टेलीमेडिसिन बवस्था दी समीक्षा कीती ते अगली पीढी दे नोड्स लेई कार्ययोजना पर चर्चा कीती।

<><><><><><>

WB-SIR

पश्चिम बंगाल च विशेष गहन नजरसानी-एसआईआर प्रक्रिया दे तैहत विचाराधीन मतदाताएं दी सूची दी जांच मगरा, विवादित मतदाताएं दी पैहली पूरक सूची अज्ज प्रकाशित कीती जाई सकदी ऐ। गहन पुनरीक्षण मगरा 28 फरवरी गी जारी खीती मतदाता सूची च 60 लक्ख थमां मते नां विचाराधीन हे। पूरक सूची जारी होने सोयां पैहले, कलकत्ता उच्च न्यायालय दे मुख्य न्यायाधीश सुजाँय पॉल होंरें कल कानून व्यवस्था सुनिश्चित करने ते एसआईआर प्रक्रिया च शामिल न्यायाधीशें ते न्यायिक अधिकारियें दी सुरक्षा आस्तै आपातकालीन बैठक सद्दी।

<><><><><><>

Israel Attack Iran

इस्राएल नै प्रधानमंत्री बेन्यामिन नेतन्याहू हुंदे आसेआ ईरान प्रमुख गैस क्षेत्र पर हमला नेई करने दी घोषणा दे इक दिन मगरा ईरान पर हमले परतिऐ शुरू करी दिते। इस्राएल नै ईरान दे फारसी नमें बरे नवरोज दौरान अज्ज तेहरान पर हवाई हमले कीते। राजधानी दे आले दोआले धमाके दियां खबरां आईयां ना। इस दौरान ईरान नै खाड़ी क्षेत्र च ऊर्जा ठिकानें पर हमले तेज करी दिते। साह्दे संवाददाता नै दस्सेआ ऐ जे नमे बरे नवरोज ते ईद बश्कार बददे संघर्ष ते महत्वपूर्ण ऊर्जा प्रतिष्ठानें पर व्यापक हमलें उत्सवें दी रौनक फीकी करी दिती ऐ। पश्चिम एशिया संघर्ष दा सीधा असर ऊर्जा आपूर्ति ते रोजमर्रा दी जिंदगी पर पवार दा ऐ। कुवैत च, अज्ज बडलै मीना अल-अहमदी ते मीना अब्दुल्ला रिफाइनरी पर ड्रोन ते मिसाइल हमले होए, जिसदे च केई परिचालन इकाइयें च अगग लगीं गईं। अधिकारियें मगरा दस्सेआ जे अगग पर काबू पाई लैता गया ऐ। तोआई, लेबनान च, बेरूत दे अन्दर इलाकें च हवाई हमले कीते जा र दे ना। जिनदे प्रमुख सरकारी थाहरे दे कश क्षेत्र बी शामिल ना। इस्राएल च, हाइफ़ा च इक तेल रिफाइनरी पर मिसाइलां दागियां गईयां, जेडा देशै दे घरेलू ईंधन उत्पादन दा महत्वपूर्ण हिस्सा ऐ। कतर दे रास लाफान संयंत्र गी व्यापक नुकसान पुज्जा ऐ। संयुक्त अरब अमीरात च, मिसाइल हमलें ते मलबा डिग्गने मगरा हबशान गैस संयंत्र ते बाब तेल क्षेत्र सने प्रमुख संयंत्रें गी अस्थायी रूप कन्नै बंद करी दिता गया। इस दौरान, होर्मुज जलडमरूमध्य लगभग बंद ऐ, जिसदे क्रनै तेल ते ऊर्जा आपूर्ति बाधित ऐ।

<><><><><><>

PM -Qatar Talks

प्रधानमंत्री नरेन्द्र मोदी होरें कल कतर दे अमीर शेख तमीम बिन हमद अल थानी हुंदे नै टेलीफोन पर गल्लबात कीती ते उनेंगी ईद दी बधाई ते शुभकामनां दितियां। मोदी होरें आखेआ जे भारत कतर कन्नै पूरी इक्क-मिक्कता नै खडोते दा ऐ ते क्षेत्र च ऊर्जा ढांचे पर हमले दी सख्त निंदिया करदा ऐ। इक सोशल मीडिया पोस्ट च प्रधानमंत्री मोदी होरें कतर च भारतीय समुदाय दे लोकें दा ख्याल रखने, उन्दी दिक्खभाल करने ते इस ओक्खी घड़ी च उनेंगी समर्थन देने लेई कतर दा आभार प्रगट कीता ते इलाके च शांति ते स्थिरता दी कामना कीती। दौने नेताएं होर्मुज जल डमरु मध्य थमां ज्हाजें दे सुरक्षत ढंगै सिर निकलने पर जोर दिता।

<><><><><><>

European Countries -Hormuz

बरतानिया, फ्रांस, जर्मनी, इटली, नीदरलैंड ते जापान नै होर्मुज जल डमरु मध्य च ज्हाजें दी सुरक्षत आओ-जाई लेई रलियै कम्म करने पर सैहमती जताई ऐ। इन देशें ऊर्जा बजार गी स्थिर करने लेई जरूरी गैई पुट्टने दी बी वकालत कीती ऐ। बरतानिया दे प्रधानमंत्री कीर स्टार्मर हुंदे दफ्तर आसेया जारी सांझे ब्यान च इनें देशें ईरान दे हमले दी जबरदस्त निंदिया कीती ते उसी कारवाई तुरत रोकने लेई बी आखेआ ऐ। उ'नें ईरान अगगे अपील कीती ऐ कि ओ होर्मुज जल डमरु मध्य गी कारोबारी ज्हाजें लेई बंद करने दी धमकी देना- बरुदी सुरंगां बधाने ते ड्रोन ते मिसाइली हमलें तुरत बंद करै। ब्यान च आखेआ गेआ ऐ कि अंतराश्ट्रीय ज्हाजें दे रस्ते च रुकावट ते ऊर्जा सप्लाई च रुकावट दुनिया दी रमानदारी ते सुरक्षा लेई खतरा ऐ। तोंआई अमरीकी राश्ट्रपति डोनाल्ड ट्रम्प होरें नाटो सनें होरनें देशें अगगे अपील कीती ऐ कि ओ होर्मुज जल डमरु मध्य गी परतियै कारोबारी ज्हाजें लेई खोलने च मदद करै।

<><><><><><>

PM -IGNC Arts

प्रधानमंत्री नरेन्द्र मोदी होरें कल नमीं दिल्ली च इंदिरा गांधी राश्ट्रीय कला केन्द्र ट्रस्टियें कन्नै मलाटी कीती ते देसै दी बन-सबन्नी संस्कृति गी होर मता लोकप्रिय बनाने पर चर्चा कीती। इक सोशल मीडिया पोस्ट पर मोदी होरें लिखेया कि इस लक्ष्य गी हासल करने दी यात्रा च होर मते लोकें गी जोड़ने, डिजिटल ते जमीनी पैहलकदमियें राएं लोकें तगर पुज्जने ते देसै दी सगगोसार विरासत दे संरक्षण ते एहदे प्रचार-प्रसार ते लोकप्रियता गी बधाने च कलाकारें ते विद्वानें गी सहायता देने पर बी चर्चा इस मलाटी दौरान कीती गेई। इंदिरा गांधी राश्ट्रीय कला केन्द्र भारत सरकार दे संस्कृति मंत्रालय दे तैहत इक खुदमुख्तयार संस्थान ऐ- जेहड़ा भारतीय कला, संस्कृति ते विरासत दे संरक्षण, अनुशासन ते प्रचार प्रसार लेई कम्म करदा ऐ।

<><><><><><>

Nadda Oral

सेहत मंत्री जे. पी. नड्डा होरें विश्व ओरल सेहत दिवस दे मौके पर लोकें सोयां मुह दी बेहतर स्वच्छता आहली आदतें गी अपनाने दा आग्रह कीता ऐ। श्री नड्डा होरें मुस्कान गी सेहतमंद ते उत्साही बनाई रखने आस्तै स्हेई चाल्ली कन्नै दंदे साफ करने, मिठ्ठा खाने पीने आहली आदत गी घट्ट करने ते नियमित दंदें दी जांच कराने जनेहू सरल उपाएं दे महत्व पर जोर दिता।

<><><><><><>

World-Sparrow Day

विश्व गौरैया दिवस अज्ज पूरी दुनिया च मनाया जा'रदा ऐ। एह दिन गौरैया दी आबादी च तेजी कन्नै आवा'रदी गिरावट गी लेईऐ जागरूकता बदाने सरबन्धी सालाना प्रयास गी दर्शान्दा ऐ। इको-सिस एक्शन फाउंडेशन दे सहयोग कन्नै नेचर फॉरएवर सोसाइटी ऑफ इंडिया आस्सेआ 2010 च शुरू होए दा एह दिन इस लौहकी जनेई चिडि आस्तै बददे खतरें दी सारत दिन्दा ऐ।



HM-Tributes

गृह मंत्री अमित शाह होरें रानी अवन्तीबाई लोधी होरें'गी उं'दी जयंती पर श्रद्धांजलि अर्पित करदे होई आखेआ ऐ जे उं'दा जीवन दलेरी, बलिदान ते देशभक्ति दी इक अनोखी मिसाल ऐ। सोशल मीडिया दी इक पोस्ट च श्री शाह होरें आखेआ ऐ जे 1857 दरान रानी अवन्तीबाई लोधी, बरतानिया हकूमत दे खलाफ मजबूती कन्नै खडोतियां ते उ'नें आत्मसमर्पण करने दे बजाय बलिदान देना चुनेआ। शाह होरें आखेआ जे उं'दा बलिदान, राष्ट्र दे प्रति समर्पण ते आत्म-सम्मान दा इक शाश्वत स्नेहा ऐ।



IMD

मौसम विभाग नै कल तगर पश्चिम बंगाल च हिमालय दे तराई क्षेत्रें ते सिक्किम च किश थाहरे पर तेज बरखा दा अनुमान जाहिर कीता ऐ। हिमाचल प्रदेश ते उत्तराखंड च बी किश थाहरे पर लगातार बरखा दी संभावना ऐ। दिल्ली, हरियाणा, चंडीगढ़, बिहार, झारखंड, मध्य प्रदेश, ओडिशा, पंजाब ते उत्तर प्रदेश च किश थाहरे पर गरज-चमक कन्नै एन गडा पौने दा अनुमान ऐ। मछुआरें गी 24 मार्च तक उत्तरी ओडिशा ते पश्चिम बंगाल दे समुद्री तटें पर नेई जाने दी सलाह दिती गई ऐ।



HP-Weather

हिमाचल प्रदेश च सक्रिय पश्चिमी ब्लाएं च खोदल करी पिछले 3 दिनें सोयां ऊंचिए धारें पर लगातार बर्फबारी होआरदी ऐ। साहडे संवाददाता नै दस्सेआ ऐ जे केई जिलें च बिजली ते सडक सेवा भी प्रभावित होई ऐ। पिच्छले किश दिनें सोयां जारी बरखा ते बर्फबारी दे चलदे कुल्लू, चंबा, किन्नौर ते लाहौल स्पीति जिलें च सामान्य जनजीवन प्रभावित होआ ऐ। कुल्लू शैहर दे मठ इलाके च ल्हास-पस्सियां दे चलते इनर अखाडा बाजार दे अध्दा दर्जन मकानें गी प्रशासन नै एहतियात दे तौर पर खाली करवाई दिता ऐ। अटल टनल रोहतांग दे आले दोआले करीब 3 फुट तक बर्फबारी होई चुकी दी ऐ। ते एह टनल फिलहाल सारी चाल्ली दी गड्डिए दी आवाजाई आस्तै बंद ऐ। तोआंई चंबा जिले दे जनजातीय क्षेत्र भरमौर ते तीसा च भी बर्फबारी ते बरखा करी बिजली आपूर्ति बाधित ऐ। इस दौरान, मौसम विज्ञान केंद्र शिमला नै अगले 24 घंटे दौरान प्रदेश दी उच्चिए च बर्फबारी, हठले इलाके च तेज हवाएं कन्नै बिजली चमकने ते बरखा दा अर्रेंज अलर्ट जारी कीता ऐ।



Indigo-Travel Advisory

ब्लाई कंपनी इंडिगो ने दिल्ली च बरखा ते गरज-चमक दे मद्देनज़र जात्तरिएं लेई सलाह जारी कीती ऐ। सोशल मीडिया दी इक पोस्ट च इंडिगो ने आखेआ ऐ जे खराब मौसम करी डुआरिएं दे संचालन च विघ्न पेई सकदा ऐ ते जात्तरिएं गी किश चिरै लेई बलगना बी पेई सकदा ऐ। उनें जात्तरिएं गी सलाह दिती ऐ जे ओहू अपने घरे शा ब्लाई अड्डे लेई निकलने शा पैहले अपनी डुआरी बारै ताजा स्थिति जांची लैन ते ब्लाई अड्डे धोड़ी दी अपनी जात्तरा लेई किश बादू समें रक्खियै अगेत्रे गै रवाना होन।



Uttarakhand Cabinet Expansion

उत्तराखंड दे मुखमंत्री पुष्कर सिंह धामी हुं'दी अगुवाई च राज्य मंत्रिमंडल दा विस्तार करदे होई 5 विधायकें गी एह्दे च शामिल कीता गेआ ऐ। देहरादून आहले लोकभवन च अज्ज आयोजित संगंध चुक्कने आहले इक समारोह दे दरान गवर्नर लेफ्टिनेंट जनरल (सेवानिवृत्त) गुरमीत सिंह होरें नमें बनाए गेदे मंत्रिएं गी औहद्धे ते राजदारी दी संगंध चुकाई।



Badminton

फ्रांस च ऑरलियन्स मास्टर्स बैडमिंटन टूर्नामेंट च अज्ज सिंगल्स क्वार्टर फाइनल च तन्वी शर्मा दा मुकाबला जापान दी नत्सुकी निदाइरा कन्नै, मालविका बंसोड दा मुकाबला हमवतन ईशा रानी बरूआ कन्नै होग।



World Indoor C'Ship

भारत 2028 च विश्व एथलेटिक्स इंडोर चैम्पियनशिप दी मेजबानी करोग। एह आयोजन उड़ीशा दी राजधानी भुवनेश्वर दे कालिंगा स्टेडियम परिसर च कीता जाग। पोलैंड च विश्व एथलेटिक्स परिशद दी बैठक च इस प्रतियोगिता दी मेजबानी दा अधिकार भारत गी दिता गेआ। भारतीय एथलेटिक्स परिशद दे प्रधान बहादुर सिंह सगू होरें दस्सेआ जे एह फैसला दर्शादा ऐ जे भारतीय एथलेटिक्स दी पंछान अंतराश्ट्रीय नक्शें पर बद्धा'रदी ऐ।



SMVD Shrine Pilgrims

बरखा ते ज़बरदस्त ठंडु दे बावजूद ज्हारां बहे श्रद्धालुएं कल "चेत्तर नरातें" दे पैहले दिन श्री माता वैष्णो देवी जी दे दरबार च मत्था टेकेआ। श्राईन बोर्ड ते प्रशासन आसेआ कीते गेदे व्यापक प्रबंधें तैहत जात्तरा बवस्थित ढंग्गै नै चला करदी ऐ ते तकरीबन 15 ज्हार श्रद्धालुएं माता वैष्णो देवी जी दे दरबार च हाज़िरी लाई। श्रद्धालुएं लेई सुरक्षा, RFID ट्रैकिंग, साफ-सफाई, खाने-पीने ते मैडिकल सेवाएं सनें सब्बै लोडचदे बंदोबस्त कीते गेदे ना। मेद ऐ जे 20 शा 30 ज्हार श्रद्धालु नरातें दरान हर रोज माता वैष्णो देवी जी दे दरबार च पिंडी रुप दे दर्शन करगंन।

